

NO. SOALAN: 15

**PEMBERITAHUAN PERTANYAAN
MESYUARAT KETIGA, PENGGAL KELIMA
PARLIMEN KETIGA BELAS (2017)
DEWAN RAKYAT**

PERTANYAAN : LISAN

**DARIPADA : YB DATO' ABD AZIZ BIN SHEIKH FADZIR
[KULIM BANDAR BAHRU]**

TARIKH : 26 OKTOBER 2017 (KHAMIS)

SOALAN:

Dato' Abd Aziz Bin Sheikh Fadzir [Kulim Bandar Baharu] minta PERDANA MENTERI menyatakan kedudukan industri hub halal negara yang terkini dan apakah perancangan Kerajaan dalam usaha meletakkan Malaysia sebagai sebuah negara rujukan dan pengeksport utama barang halal ke negara-negara Barat dan Asia Timur serta sejauh manakah negara-negara luar mengiktiraf sijil halal negara yang dikeluarkan oleh pihak JAKIM ini.

**JAWAPAN : (YB MEJAR JENERAL DATO' SERI JAMIL KHIR
BIN HAJI BAHAROM (B), MENTERI DI JABATAN
PERDANA MENTERI)**

Tuan Yang di-Pertua,

Untuk makluman Ahli Yang Berhormat, Pensijilan Halal Malaysia turut menawarkan Pensijilan Halal Malaysia Pengilangan Luar Negara. Ia diberikan kepada pemohon yang memiliki premis kilang di luar negara.

Bermula dari 2011 sehingga hari ini sejumlah 4,074 produk telah dipersijilkan di 24 buah negara.

Pensijilan Halal Malaysia Pengilangan Luar Negara akan diperluaskan skop menjadi Pensijilan Halal Malaysia (Antarabangsa). Ia berikutan daripada banyak permohonan untuk mendapatkan Sijil Pengesahan Halal Malaysia (SPHM) bagi pasaran antarabangsa. Pemohon-pemohon daripada industri mana-mana negara yang memenuhi syarat dan keperluan Pensijilan Halal Malaysia layak untuk memohon mendapatkan Sijil Pengesahan Halal Malaysia(Antarabangsa).

Selain pensijilan halal, JAKIM juga membuat pengiktirafan terhadap badan pensijilan halal luar negara bagi memastikan bahan mentah dan produk import yang dipasarkan di Malaysia diyakini status halal. Sehingga kini, JAKIM telah mengiktiraf 62 Badan Pensijilan Halal dari 41 buah negara serta lima (5) pihak berautoriti halal dalam kalangan anggota Organisation of Islamic Countries (OIC).

Integriti Pensijilan Halal Malaysia diterima dan mendapat pengiktirafan dunia. Ia dapat dilihat dalam penglibatan aktif dalam memperkuuh hubungan kerjasama dengan negara-negara luar melalui platform rasmi dan tidak rasmi. Umpamanya penglibatan ini dapat dilihat di *World Trade Organisation (WTO)*; *International Trade Centre (ITC)*, *ASEAN Working Group on Halal Food (AWGHF)*; *Indonesia – Malaysia – Thailand Growth Triangle (IMT-GT)*; *Working Group on Halal Products and Services (WGHAPAS)*; Pertemuan tidak rasmi Menteri-Menteri Agama Negara Brunei; Indonesia, Malaysia dan Singapura (*MABIMS*); dan *Standards and Metrology Institute for the Islamic Countries (SMIIC)*. Sekian, terima kasih.